

## Dithero tsa Tirelano mo Kutlwanong

*46/2013 Thero ka Sontaga wa 16 morago ga moletlo wa Borarobongwe/Trinitate, e le ka 15. 09. 2013*

**MO LEINENG LA MODIMO O E LENG RARA LE MORWA LE MOWA O O BOITSHEPO!**

1. Sefela sa 122 - 121/123
2. **Thapelo:** Morena, Modimo wa bopelotlhomogi, lorato le bopelonomi, wena yo o utlwelang masiela le batlholagadi botlhoko, le go utlwela batlaledwi botlhoko. Re a kopa gore o re utlwele botlhoko le rona baleofi ba ba tlhomolang pelo ka bopelotlhomogi le boitshwarelo jwa gago jo bo mo go Keresete Jesu, Morena le Mopholosi wa rona. Amen.
3. Epistolo ka fa thulaganyong ya 2 e kwadilwe mo go 2 Timotheo 1:7-10;  
Efangele ka fa thulaganyong ya 1 e kwadilwe mo go Johane 11:1-3.17-27.41-45.
4. A go ipolelwe tumelo ya bokeresete!
5. Sefela sa 128 - 116/121
6. Thapelo ya mmadi wa thero.
7. **Efangele** ka fa thulaganyong ya 5 e kwadilwe mo go Luka 7:11-16, e re: "Ya re kamoso (Jesu) a ya kwa motseng o o bidiwang Naine, mme barutwa ba gagwe ba ya nae, le batho ba bantsi. Ya re a atamela kgoro ya motse, ga bo go tshotswe moswi, a isiwa kwa ntle, e le morwa mmaagwe yo o esi, mme ene e le motlholagadi. Bontsi jo bogolo jwa motse jwa bo bo na nae. Ya re Morena a mmona, a mo tlhomogela pelo, a mo raya a re: 'Se lele.' Jaanong a atamela, a ama setsholo, mme ba ba mo tshotseng ba ema. Foo a re: 'Lekau, ke go raya ke re: Tsoga!' Moswi a kanamologa, a simolola go bua, mme Jesu a mo neela mmaagwe. Ke fa poifo e ba tshwara botlhe, ba be ba galaletsa Modimo, ba re: 'Moporofeti yo mogolo o tsogile mo gare ga rona!' Gape ba re: 'Modimo o lekotse batho ba ona.' Polelo eo ka ga gagwe ya utlwala mo Jutea yotlhe le mo lefatsheng lotlhe le le mo tikologong." Amen.
8. **Thero:** Baratwa ba Morena wa rona Jesu Keresete, ke a kopa gore lo nkadime ditsebe, re reetse Efangele ya kajeno, re utlwe kgakgamatso ya tsogo ya lekau la motlholagadi wa kwa Naine. Jesu o ne a tsamaya le barutwa ba gagwe le lesomo le legolo la batho. Ka letsatsi le le

latelang a tsoga, a tsamaya le barutwa ba gagwe le lesomo leo le legolo la batho. Fa o rata go itse gore Jesu o ne a tswa kae, fa a ne a ya kwa Naine, buisa mafoko mo tshimologong ya kgaolo ya 7 mo go Luka. O tla bona teng. Ya re ba atamela mo kgorong ya motse, ba re: Ba tsena mo motseng oo, ba kopana le batho ba motse, ba tswa, ga bo go tshotswe moswi, a isiwa kwa ntle mo mabitleng. Morena wa barena a kopana lo loso mo kgorong ya kwa Naine. Jesu a bona mmaalo lekau le, a bona dikeledi mo matlhong a ga maalo, a mo utlwela botlhoko, a mo gomotsa ka kgakgamatso e kgolo eo ya go tsosa morwawe. **A re tlhokomeleng bopelonomi jwa Morena mo go rona rotlhe!**

1. Morena o utlwela ba ba tlaletsweng botlhoko.
2. Morena o gomotsa ba ba hutsafetseng.
3. Morena o tiisa boikanyo jwa badumedi.

**1. Morena o utlwela ba ba tlaletsweng botlhoko.** Re bona bopelonomi jwa Morena wa rona Jesu Keresete. O dira se se tshwanetseng leina la gagwe le go nna Mopholosi, le Motshedisi wa rona, gonne re mmona mo Efangeleng e e leng Lefoko la thero ya kajeno ka fa a gorogileng kwa Naine ka teng, a bonwa mo ponatshegong, kgalalelo ya thata ya gagwe ya bonala mo matlhong a barutwa ba gagwe le mo lesomong la batho ba ba tsamaileng le ene le mo go bone ba phitlho ele. Ba bona mo kgorong ya motse wa kwa Naine Morena wa botshelo a kopana le morena yo o maswe, e bong loso. Morena wa botshelo, e bong Jesu, a fenywa loso ka go tsosa moswi mo losong. Motlholagadi a gomodiwa ka bopelonomi jwa ga Jesu. Jesu a fodisa pelo ya motlholagadi, a phimola dikeledi mo matlhong a gagwe.

Phuthego, go ntse jalo. Le kajeno Mopholosi wa rona o sa ntse a bona botlhe ba ba mo lelelang, le go ba gomotsa ka go ba bolelela gore lo se ka lwa lela. Bonang lorato lwa me, le bopelotlhomogi jwa me jo bo tlhageseditsweng baleofi. Motlholagadi yole o neng a tlhokofalelwa ke monna o ne a ikanya Jesu. Ke thuto mo go rona gore mo ditlalelong le rona re ikanye, le go ineela mo go Jesu. Ee, re itshwarelele mo go Jesu mo ditlalelong tsa rona, re se latlhe Mopholosi wa rona, re ipatlele thata ya go itshokela ditlalelo le dikhutsafalo tsa rona mo go ene. Mme motlhalagadi yole o ne a batla thata mo go Jesu. Jesu a mo utlwela botlhoko, a mo tiisa mo tumelong bogolo ka go mo tsoetsa morwawe. Jesu ke Mothusi wa masiela le batlholagadi. Kana Jesu ga a tshwane le batho ba lefatshe. Mo bathong ba lefatshe motlholagadi ke selo fela se se nyatsegileng, bogolo mo morafeng wa rona ga re akanyetse batlholagadi le masiela sentle. Kana Jesu o gopola masiela le batlholagadi. Mme fela fano ga go

buiwe ka ga batlholagadi le masiela ba ba sa reng sepe ka Jesu, le e seng ka ga ba ba itatlang ka go gana go ineela mo Moreneng, le go ineela mo bosuleng fela.

Phuthego, re ka re: Rotlhe re batlholagadi, gongwe baswagadi. Re tshwanetse go ipolela, re se itatole ka gore ga re batlholagadi, gongwe baswagadi. Tota go na le mo phuthegong ya bokeresete batlholagadi le baswagadi ba le bantsi. Ke raya ba ba swetsweng, le go tlhokofalediwa tumelo ya bone, e le ba ba sa tlholeng ba tsena kereke, le e seng go amogela selalelo sa Morena, le e seng go ntsha ditshwanelo tsa bone mo phuthegong. Ke re: Ke ba ba swetsweng, le go tlhokofalelwa ke lorato. Ga ba tlhole ba rata Morena. Le wena, tsala ya me, tsenya seatla mo sefubeng, o itlhotlhomise gore a o ineetse mo Moreneng ka pelo yotlhe, gongwe o moitimokanyi fela? Fa go ntse jalo, le wena o motlholagadi, gongwe moswagadi.

**2. Morena o gomotsa ba ba hutsafetseng.** Jesu o ne a atamela, a ama setsholo, mme ba ba mo tshotseng ba ema. Foo a re: Lekau, ke go raya, ke re: Tsoga! Ga fela selelo, moswi a kanamologa, a simolola go bua. Jesu a mmusetse mo go mmaagwe.

Barategi, fano re bona gore dipelo tsa batho ba ba hutsafetseng di gomoditswe. Ba ba neng ba lela mmogo le mmaalo lekau lele ba didimala ka ntlha ya tiro ya Morena. Lefoko le le reng: Se lele! le sa ntse le na le thata kajeno mo go rona badumedi. Ikanye Jesu, o ineele mo go ene, o itshwarelele mo go ene yo o nang le thata ya botshelo, gonne ke ene yo e leng kgoro ya legodimo le kgalalelo ya botlalo.

Ka nako eo moswi o ne a belegwa ka setsholo. Kajeno re isa moswi ka koloi, gongwe ka sepalamo se sengwe mo mabitleng. Jesu o ne a atamela, a ama setsholo. Ba ba se belegileng ba ikokobeletsa Jesu, ba ema. Ka moo le rona a re ithuteng kajeno go ikokobeletsa seatla sa Morena, bogolo fa go ka diragala ka letsatsi lengwe gore Morena a ame mmele wa rona ka bolwetse. Ke tshwanelo gore re eme, re ikokobeletse seatla sa Morena, re se tshabe ka go ya mo dingakeng tsa mereo, gongwe mo go bone ba ba dupang baloi, re se ineele mo mokgweng oo wa go botsa gore re loilwe ke mang? A re ithuteng mo Efangeleng eno kajeno gore re gomotse dipelo tsa rona mo Moreneng. Gape mo dikhutsafalong tsa rona re lebe Jesu gore ke ene yo o re bonetseng tse di re tshwanetseng. Ke ene yo o atlholang gore re tla tshela, gongwe nyaya. A baakanyetsa motlholagadi yole , a re: Ke ka go thusa ka go go tsosetsa morwao gore a tshela. Jesu a mo mmusetse mo botshelong jwa mono mo lefatsheng. A le rona re kope bogolo gore Morena a re tsosetse botshelo jo bo tlang, jo bo sa khutleng. Fa re tshela Keresete, re na botshelo jwa nnete jwa phologo. A re itshwareleleng mo go Keresete yo o

neetseng botshelo jwa gagwe ka go re swela mo sefapaanong. Teng foo re tla bona kagiso mo pelong le mo segakoloding le kgomotso e e sa feleng.

**3. Morena o tiisa boikanyo jwa badumedi.** Ya re Jesu a tsosa lekau lele, "poifo ya ba tshwara botlhe, ba be ba galaletsa Modimo, ba re: Moporofeti yo mogolo o tsogile mo gare ga rona!" Gape ba re: "Modimo o lekotse batho ba ona." O ka re: batho ba kwa Naine, ba re: Tota fano re mmogo le moporofeti. O agile le rona mono mo motseng wa ga etsho.

Phuthego, le rona re tshwana le ba kwa Naine ba ba reng: Moporofeti yo mogolo o tsogile mo gare ga rona. Motho ke wena, wena yo o sa rateng go dumela mo go Jesu, le go belaela malebana le ene, wena yo o sa dumeleng molaetsa wa boitumelo wa ga Jesu, mme o dumela dinaane le dikgang tse dintse tsa lefela. Ka gongwe o kile wa lwala mo go maswe, mme wa bona thata ya Morena, wa fola, wa bua, wa re: Iyoo, ke batlile go swa! O buelang mafoko ao? Kana a ga o itse Keresete gore o teng mo gare ga rona ka metlha, motshegare le bosigo? Jesu a re: Ke nna Modisa yo o molemo. A ga o itse gore modisa o ntse fa gare ga dinku tse a di disang? Gape Jesu o bua, a re: "Itseng, ke na le lona ka malatsi otlhe go ya bokhutlong jwa lefatshe!" Ka moo a re se ka ra boifa Satane, le fa a duma, le go tlhodia mo go maswe, gonne re na le Morena yo o fenyang Satane.

Polelo eo ka ga Jesu ya utlwala mo Jutea yotlhe le mo lefatsheng lotlhe le le mo tikologong. Ke kgang e kgolo e e diragetseng, batho ba atisa polelo ka ga Jesu ka go bolelela ba bangwe ditiro tse di dirilweng ke Jesu fa gare ga bone. Potso e kgolo mo go rona kajeno ke ya gore a wena o phatlalatsa kgalalelo ya ga Jesu fa gare ga baswagadi, le batlholagadi ba o agileng mo gare ga bone? Ka gongwe mongwe o tla re: Ga ke moruti, gongwe moefangedi. Mme tota o agile mo gare ga baswagadi le batlholagadi, ke raya bone ba ba swetsweng, go tlhokofalelwa, le go latlhegelwa lorato, ba ba itunneng fela, ba sa tlhokomele sepe sa tumelo. A ba swetswe, le go tlhokofalelwa ke wena yo o fa pele ga bone, yo o tsamaelanang le bone. Ka moo o na le molato mo meweng ya bone. Wena o bonye, o utlwile ka ga ditiro tse dikgolo tsa Morena tse re di diretsweng rotlhe, phatlalatsa tumo ya Morena. A Morena a re fe thata go dira jalo! Amen.

**9. Thapelo:** Morena Jesu Keresete wa bopelotlhomogi, boloka Lefoko la gago mo dipelong tsa rona tse di hutsafetseng ka go tiisa boikanyo jwa tumelo ya rona. O re femele, Morena, gore mo ditlalelong tsa rona re se ka ra kgaogangwa le wena. Morena wa loso le botshelo, o re fe thata go tiia mo ditlalelong, go ya re tswa mo tikologong eno ya

ditlalelo, re tsenā mo pusong ya gago ya boitumelo ka bopelotlhomogi jo bogolo jwa gago. Amen.

Thapelo ya Morena: Rara wa rona yo o mo legodimong ...

10. Sefela sa 127 - 115/117

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke A. Sibiya ( † ), ka ngwaga wa 1967/2007

Kgatiso le go rongwa ga dithero tseo go tshagediwa ke kopano e e bidiwang The Lutheran Heritage Foundation.